
PEDIJATRIJSKA STOMATOLOGIJA

Klinički pristup

Urednici:

Göran Koch i Sven Poulsen

I izdanje

Munksgaard, Copenhagen, 2001

482 stranice

ISBN 87-16-12271-2

Prvo izdanje PEDIJATRIJSKE STOMATOLOGIJE sa kliničkim pristupom, opsežan je tekst, napisan od strane velikog broja respektabilnih profesora i istraživača iz različitih oblasti, uglavnom iz Skandinavskih zemalja.

Knjiga je napisana na 482 stranice, a tekst je podijeljen u 23 poglavlja, dobro ilustrirana brojnim crno-bijelim i color fotografijama, dijagramima i tabelama.

U uvodu knjige, urednici izražavaju svoju namjeru i želju da ovaj tekst posluži kao osnovno štivo iz pedodoncije za studente, ali i da bude relevantan za studente postdiplomskog studija, kao i za stomatologe praktičare koji žele osavremeniti svoje znanje i praksu s ciljem da u svoj svakodnevni rad uvedu najsavremenije naučna dostignuća i tehnike.

Prvo poglavlje daje kratki historijski pregled pedijatrijske oralne zaštite, te obrazlaže odgovornost koju društvo treba da snosi kad je u pitanju ova stomatološka disciplina. U drugom poglavlju prezentirano je stanje oralnog zdravlja djece i adolescenata u Skandinavskim zemljama u posljednjim decenijama, sa posebnim naglaskom na modelu i trendovima oralnih oboljenja u ovim zemljama.

Slijedeća tri poglavlja (3., 4., 5.) razmatraju somatski rast i razvoj djeteta, mentalni razvoj i probleme i tehnike vezane za prilagodavanje ponašanja djeteta u stomatološkoj ordinaciji.

Svrha šestog poglavlja, kako to sami autori navode, je da opiše postupak uzimanja anamnestičkih podataka i klinički pregled djeteta i adolescenca. Objasnjen je sistemski pristup neophodan da bi se prikupili relevantni podaci potreбni da se dođe do korektnе dijagnoze.

U poglavlju 7 opisan je radiografski pregled i dijagnoza. Težište je stavljen na adekvatan kriterij selekcije radiografske metode, optimiziranu zaštitu od zračenja i detaljno korištenje svih informacija koje nudi rendgenogram.

Poglavlje 8 bavi se važnošću i konceptom prevencije karijesa, te osnovama prevencije. Također je detaljno opisana evaluacija i identifikacija riziko-faktora karijesa.

U slijedećem poglavlju obraden je bol, kontrola bola i sedacija kod djece i adolescenata. Autori razmatraju sve metode kontrole bola i straha koje se mogu primijeniti kod djece i adolescenata, ali je najviše prostora ustupljeno lokalnoj anesteziji/analgeziji i sedaciji svjesnog pacijenta.

Tema desetog poglavlja je karijes kod djece i adolescenata i njegov tretman. Ukratko, ali veoma jasno su opisane metode i sredstva za dijagnostiku karijesa, a isto tako i planiranje tretmana. Sam tretman karijesa opisan je posebno za različite dobne skupine (0-3, 3-6, 6-12 i 12-18 godina) obzirom na specifičnosti u različitim stadijima razvoja.

Logičan nastavak ovog je poglavlje 11, koje je posvećeno pedijatrijskoj endodonciji, kako mlječnih tako i mlađih trajnih zuba. Autori su dali prostor svim aspektima od dijagnoze, endodontskih tehnika i medikamenta do komplikacija tretmana, dugoročne prognoze i praćenja rezultata liječenja. U okviru ovog poglavlja opisane su i hitne intervencije kod djece te upotreba antibiotika.

Poglavlje 12 opisuje normalan periodoncijum kod djece i adolescenata, kao i njegova patološka stanja, dok se naredna dva poglavlja bave razvojnim anomalijama broja i oblika zuba te strukture tvrdih zubnih tkiva.

U poglavljima 15 i 16 opisana je erupcija zuba, smjena mlječnih stalnim zubima i razvoj okluzije. Ova poglavlja nude veoma korisne, a u osnovi jednostavne opće preporuke za praćenje razvoja okluzije kod djece.

Poglavlja 17 i 18 razmatraju sve aspekte traumatskih povreda zuba. Imajući u vidu da se najveći broj povreda zuba dešava u djetinjstvu, autori su prezentirali dovoljan broj informacija sa namjerom da čitaoca pripreme za kompleksan i često izazovan zadatak u zbrinjavanju traumatskih povreda.

Poglavlje 19 se odnosi na lezije oralne sluznice, kao i na oralno-hirurške intervencije kod djece i adolescenata, a zatim slijedi poglavlje o poremećajima temporo-mandibularnog zgloba.

U slijedeća dva poglavlja (21., 22.) opisan je stomatološki rad sa djecom sa hroničnim oboljenjima kao i sa djecom sa specijalnim potreбama.

Udžbenik se završava poglavljem o stomatološkom timu u dječjoj oralnoj zaštiti, u kojem je uglavnom pojašnjen Skandinavski sistem stomatološke zaštite djece i adolescenata.

U zaključku možemo reći da ova knjiga predstavlja značajno novo štivo kako za dodiplomski studij, tako i za studente post-diplomske nastave, te za stomatologe koji žele da osavremene svoje znanje i vještine, kad je u pitanju dječja stomatologija.

Ovaj udžbenik je izvrsno ilustriran crtežima i fotografijama različitih stanja u kliničkoj praksi, koje

dobro dopunjavaju tekst i dodatno pojašnjavaju ono što su autori imali namjeru prikazati.

Citiran je veliki broj najnovijih stručnih i naučnih referenci i sve je uklopljeno u veoma promišljen i lako čitljiv tekst. Urednici su izabrali saradnike koji su zaista respektabilna imena u svom domenu, što je doprinijelo tome da čitajući tekst udžbenika imamo utisak da je pred nama zapravo stručni časopis novijeg datuma.

dr. Amina Huseinbegović